



B. Audran Sc.

SERENISSIMO PRINCIPI
AURELIANENSIVM DUCI

DEDICAT, VOVET, ET OFFERT

OBSEQUENTISSIMVS J. L. ALLEAUME, S.F.M.P.B.

QUESTIO MEDICA,

CARDINALITIIS DISPUTATIONIBVS.

*manè discutienda in Scholis Medicorum, die Jovis octavà mensis
Maii, Anno Domini M. DCC. XLIX.*

M. JOANNE-STEPHANO GUETTARD, Regiæ Scientiarum
Academiæ Socio, Censore Regio, & Serenissimi Aurelianensium
Ducis Botanico, Doctore Medico, Præsidente.

An paucis & simplicibus contento atas longior, vita salubrior?

I.

OMNE NOCET NIMIUM, MODICIS EST LONGIUS ÆVUM;
SUMMA CADUNT, DURANT SED MODERATA DIU.



ATURAM si sequeris ducem, vix aberrabis; teste Tullio:
Modò suadet, mox imperat. Suadenti, auscultandum; imperanti;
minimè reluctandum. Quidquid contrà fit, non impunè fertur.
Caveas tamen ne dum ei velis obtemperare, sancitas ab eadem
leges, imprudens, transilias. Ne te ducat in vitium culpæ fuga,
neque decidas in syllam cupiens vitare charibdim; in omnibus
esse modum sapienter constitutum pulchrè calles. Hunc firmiter
qualem decet justum & tenacem propositi virum tene. Natura paucis est contenta;

A

quidquid ejus excessit modum, pendet instabili loco. Necessaria tantum postulat; nec plus ultrà. Qui quærit multa, mala quærit. Cui contingit quod satis est, nihil amplius optet. Hinc nec plus quam par erit cibi potisque assumendum, nec æquominus. Uterque pari celebrandus necessitate. Reficiat uterque, non sternat. Nutriat, non obruat. Id fiet cum quantum succi nutritii avolaverit, tantundem fuisse refarcitum, tibi fuerit perspectum. Scias interim id ipsum te affecutum esse, si functiones citò, tutò & jucundè, si liberè, si cum constantià quâdam, certa sanitatis & roboris indicia, exerceantur. Rem exemplo juvat illustrare. Quemadmodum enim superficies aquæ oblatas rerum imagines clarè nequit exhibere, si placida non sit ac limpida; sic mens res objectas non potest percipere, sic corpus sua alacriter munia obire nequit, nisi corpus impuris sordium fontibus sit immune.

I I.



ERUM ea est hominis lapsi misera sors, lugenda conditio, ut cum Tragici Medea, meliora quidem videat sæpè sæpius, probetque, deteriora tamen plerumque sequatur. Si verbis adicias fidem, sanitate nihil jucundius, nihil præstantius, amissam dolet, restitutam prædicat, ut amatam sibi Vestalem habet, Reginamque præ cæteris colit Penelopem. Quisque demùm eam ambitionè quærit, nullus ferè invenit. Nec mirum! Quæ parens Natura dedit ad salutem, exitio vertitur; cibus potulentisque non tam utitur, quam abutitur. Blandis voluptatum lenociniis irretiri nos patimur; aspice libidinosum, ut gulæ totus serviendo turgescit, ut cæno volvitur, & amica luto sus, genio indulget suo. Auream verò si negligas mediocritatem, quot mala te undique circumveniant? E contrà si ad ea quæ à simplici tenuique victu dimanant commoda, paulisper attendas, quæ & quam ampla omnium bonorum feget te manet? Hæc inter erinet integra sanitas. Est enim ea individua frugalitatis comes, undè suâ velut sponte fluit ætas longior, salubrior, scilicet sanitas à libero functionum exercitio, hoc ab expedito jugique solidorum cum fluidis commercio; sed amicum illud amborum fœdus non magis elucet, non magis perficitur, quam si ab omni colluvie immune stet corpus, atque vigeat. Felicem illum hominis statum à legitimo rerum non naturalium usu, imprimis verò cibi & potus scaturire nemo nescit. Sit cibus simplex, tenuis; sit similis potus; dicta hæc surgunt commoda. Concoctis nimirum cibus, mutatis, assimilatis, nil remanet noxium, nil superfluum; tum demùm calor naturalis, si quid sit, actione vigens perpetuâ, toto digestionis negotio semel peracto circà id post modum occupatur, undè ejus quod nociturum erat, coctio, & per varia corporis spiracula eliminatio, expulsiò.

I I I.



TILIA selige, fuge noxia, amove superflua, hæc tria sunt sanitatis veluti compendium, in eâque tuendâ arcanum arcanorum maximum. Cibus non qui plurimus, sed qui suavissimus, eligatur. Parabile & appositum est quod natura desiderat; ad supervacanea sudatur, ad manum est quod satis est. Quot hominum unus venter exercet? Illi verò apud Medicos cibi potusque utiles dicuntur, qui vitam solidis *crasim* conciliare, genuinamque fluidis *diætesim* conservare tueri, fovere valent. His contraria nociva sunt. In genere naturæ inimica sunt superflua, nimis exquisita, vim ejus & robur excedentia. Verbo detrita actuositate vitæ vires nostræ languent, eas laboribus diuturnis lapsas restaurare expedit. Præsto sunt alimenta tam boni succi quam indolis. Mox fatiscibat

3

innatum fibris elaterium, illud novis eas alluentibus succis nunc refistit. Mox peccabat fluidorum motus minutus horum quantitate, depravatâ simul qualitate, novo succorum nutritiorum incremento nunc rescinduntur. Quid si rigentibus nimium fibris, rigentia nimium addas, nonne erit oleum igni addere? Sic spirituosî liquores, sic acria laedunt maximè. Quid si sic depravatis fluidis, vel pravam adhuc dum qualitatem, vel nimiam horum miscendo atque ineptè cumulando conchilia turdis, qualitatem procreanda, ingeras; erit sanè morbum morbo congerere. Vid'en quantâ cautelâ necesse sit in conveniènti ciborum administratione. Num à quocumque vivendi modo te fieri sanum existimes? Noli putare; quæ ad optandum sanitatis templum via perducit, facilis admodum; fallax, lubrica ac plurimis aspera deprehenditur. Plures enim videas in ipso sæpè tramite fatalem subire ruinam; isti quod assequi putant, non assequuntur, & miserè pereunt. Infani! in innumeros ferè apoplecticos, vertiginosos, anhelantes, syncopicos, suffocatos, mentem converte; undè ipsis prima mali labes, nisi à ciborum omnigenum quantitate & qualitate peccantium ingurgitatione vix in-ruptâ. Eritne quispiam sanæ mentis qui hæc vel audiendo, vel legendo non agnoscat quàm necesse sit ad beatos, tranquillos, nec diris morborum spiculis exagitatos dies transigendos, modicè modicis uti.

I V.



UIS agrestem oculis subijce continuis sese laboribus exercentem; affixum campis, frigora, æstus & externa quæque sustinentem, cibis simplicibus, siccis, duris, tenacibus & pro virum momento tantum utentem, contemplare; ut vasto incedit corpore, duro, constanti, firmo, ut laboris patiens est, ut morbos validos arcere valeat. Olli thorax latus, amplus, abdomen gracile & compressum; humeri, brachia, femora, crura, firma; torosa, carnosa, hirsuta, densis setolisque pilis hirta; cutis dura, caro multa, adeps parcior, porro omnia hæc non aliunde scaturire quàm à moderato, necnon naturæ consentienti alimentorum usu, certissimum est. Istum pariter longaviorem futurum faciliè existimo. Aliud non inferioris momenti exemplum in Riverio reperitur. Vir nobilis cum ad triginta-quinque annos vitam insalubrem vixisset, licet multis remediis usus esset, variis frequenter morbis confectus, tandem Medici prudentis consilio solo victu simplici, diætâ tenuiori morbos illos capit oppugnare, quâ perseverante cibum scilicet & potum sensim imminuendo, obtinuit ut vitam incolumem à morbis liberam atque vegetam fuerit expertus, quam ultra centesimum suæ ætatis annum produxisse legitur. Aperi divinum Hippocratem. Sanitatis inquit studium est non satiare cibis & impigrem esse ad labores. Aliàs: ubi plus cibi quam pro naturâ ingestum est, hic morbum facit: alibi dissimilia & ciborum multitudine seditionem movent. Huc spectat Galeni dictum: majores nostri paucioribus morbis laborabant quia frugalius vivebant. Plurima cibariorum Senecæ credendum, coinquant, non alunt. E sacris codicibus cernitur edictum illud; ne te effundas super escam, in multis enim cibis erit infirmitas; propter crapulam multi obierunt, qui autem abstinentes est, adjicit vitam. Si à podagrâ ut à cæteris morbis liberari cupis, aut pauper sis, aut ut pauper vivas. Vera corporum desecatrix frugalitas, & fictitia quadam paupertas hos & chronicos similes morbos sæpius curat. Silentio non premam exemplum à Domino Hoffmanno allatum. Dives germanus omni deliciarum genere assuebat; otio, mollitici deditus erat; ille ut similitur viventibus accidit, sævissimâ adeo correptus fuit arthritide ut torpentia vix membra movere summum ob dolorem poterat, nisi titubanti ambo subcurrerent ministri. Sed corrumpente sensim fortunâ eo usque is pœnuriæ fuit redactus ut non minifris tantum carere, sed vivendi etiam modo summe tenui & parco dura eum atque flecti nescia cogeret necessitas; hinc miserâ preffus solus incedere paulatim cœpit &

Fried. Hoff.
Olserv. Cir.
Arth. & Rh.

4

assuevit, tandem arthritide tali vivendi genere omnino liberatus fuit. An hæc commoda aliundè scaturiunt quam à simplici & tenui victu ?

V.



LIGITUR concedas mihi necesse est firmiori sanitate frui eos qui simplicibus & paucis utuntur cibis, adeoque longæviori vitâ præditos. Sed inquires ? Dictu hoc magis quam factu facile. An Reges, an Magnates simplicibus & vilibus cibis vesci convenit ; an ii quos civilis vitæ status ad magnos sumptus splendidaque trahunt convivia ? Respondeo cum Sancto Gregorio III, moralium. Non cibus sed appetitus in vitio est ; hinc lautiores cibi persæpe sine culpâ sumuntur si ad temperantiæ modum ; abjectioresque non sine reatu conscientiæ. Hinc villis nonnumquam bajulus illautum fabarum magna avidè liguriendo gravissimè & peccat & plerumque sibi nocet dum exquisitissimos etiam cibos absque noxâ quâlibet edit vir in superiori collocatus civium ordine. Non autem præcipio ut ventri subtrahas alimenta ; contumax est, non potest vinci. Sed latet hic dolus & subtilissimus concupiscentiæ laqueus quo sæpè irretimur obtentu necessitatis negotium obumbrans voluptatis. Erycius quidam Philoxenus, insignis helluo, collum gruis, collum tricubitale, ex comico, sibi dari optabat ad sensum voluptatis & gulæ majorem efficiendum. Dices 2º. plures reperias ad extremum usque senium provectos qui multis cibis quotidie sese ingurgitarunt. Respondeo, Rara avis in terris, 3º. Ex Hippocrate largiori diætâ magis utendum ut facilius externa quævis sustineri queant, Fateor ; id verò intelligendum relativè tantum ad unius cujusque temperamentum, consuetudinem, ætatem. Enim verò quilibet largius paulo vivere potest, parce tamen respectivè ad illius exercitia. Ut constet quam parvo fames extinguatur. Te ipsum numera, metire corpus, stomachum consule. Scies non esse necessarium quod mensuram excedit. Naturæ pauca sufficiunt, luxuriæ nihil. Bonæ igitur valetudinis & longævitatæ quasi quædam mater est frugalitas inimica luxuriosis epulis & aliena nimix vini abundantix. Hinc concludimus.

Ergo paucis & simplicibus contento atas longior, vita salubrior.

Proponēbat Parisiis JACOBUS-LUDOVICUS ALLEAUME ;
Parisiſinus, Saluberrimæ Facultatis Medicinæ Parisienſis Baccalaureus,
A. R. S. H. 1749, à sextâ ad meridiem.